

Titus

Nda ən Mbulus fa

¹ Kyagha deleewar dāba ya a har Mbulus, mafad Faara tǝthlǝnda Yeeso Kǝrǝsti. A chik pǝr labar fǝrkǝkafek ni a fǝngya fǝrgħa kǝkafek wurna Faara. Tsahang ngi kanda ha a sǝn kǝkafek nda na a kyad ndaarha na nda a wiirha hai ahu kwaman Faara mǝmǝl,

² ahu shiteena yi wal yibrha mbuwa ngwalaarha. Faara mbuwa nggabaarha ndǝn fǝrangga dǝf miighǝn kǝm ka a katǝrad kǝshiirha.

³ Tǝrgħa a mǝmǝlla sayiddi pǝr dǝ ndǝn hu labarghǝnǝn, fǝre na ndan hu haara hai ndaana Faara tǝ hǝrǝkrǝ nǝm.

⁴ Niya chireethleng nda Titus dǝ ka Waana hu fǝrkǝkafek nanǝm tǝghǝn. Ngwa tsauka nggayirha tǝ dǝdemnggirha yi Chinǝm Faara tǝ Yeeso Kǝrǝsti tǝ hǝrǝkrǝ nǝm nagħa tǝ kǝm.

Tar Titus a Kiriti

⁵ Mal ni sa a Kiriti ka a ngwalangga tahad tar nǝm, tǝ kǝm fadangga Mamngya ahu talya heu kǝla pǝro ni.

⁶ A nagħa mamnda kula ǝn 'yaara a mbed fiya, tsauka tǝ nuneefa tal. Wanggighǝn kǝm fǝr nda kǝkafek tǝ Yeeso Kǝrǝsti. Wanggighǝn a sǝn kanda nda mbǝ waya ni mbuwa ǝna bǝreukirha nduwa sarfarha wa.

⁷ Tsaunǝn kee, mamnda na a ǝna taara hu kǝn hwan Faara a nagħa niifa ni sǝnna nda na ǝn

ənadghən ngga. Mbə niifa ni na ngyangthlang wa, nduwa niifa na hufrrha hur ka ka wa. A tsauka mbə sa mbaala nduwa yakh yanda tə fiya wa. Mbə niifa ni na suna wudəbəla wa.

⁸ A meyedghən tsauka niifa ni na thlə rongya fa, niifa na midghən əna 'ya na ngga, niifa ni mbuwa ngingiləm, niifa ni chahal, niifa ni na tə kəkafek fa, tə kəm niifa ni na a kəs altenggən ngga.

⁹ Kala mamnda wurna a tsauka fərdə kəkafek kanglang tə labar Yeeso, fərang kaali finginga hu pər labar Faara tə tsaharha ha yi kəkafek, a tangsanggən finginga na a sərək tsahadghən ha.

¹⁰ Na finginga sə hangga na a əna kakyathlanga, na thlək labarya kaka, mbə kəla finginga Yahudaya wa tsauka fatakkwaya.

¹¹ Təta ni a yanang ngganda kanda a nggasa nda hai, kəsər thleng nda huden fa wuraya kaan tə tsahang 'ya kanda ha kamngwa wa ka wudəbəla.

¹² Ko niif ndan tal tsauka annabi thləkdə ndaarha, “Kiritaya kətsar fa nggabaya ni kanda, fa mbəlfeyya, na səbrha a yindan, fa kwaya hur ni kanda.”

¹³ Labardi ya kəkafek ni. Tsaunən kee yanang kanda ngga, tənə nda naarha kanglang hu fərkəkafek,

¹⁴ tənə nda malang sək asədad Yahudaya, tə kəm takkwa ngyakhkya fiya malangga fərkəkafek.

¹⁵ Kala 'ya na chahal yi nafiya ni natə hura chahal. Amma mbə 'yasə na naarha chahal a fad finginga fər wa kəkafek nduwa chahalla hura kəsər ən ənad ndan tə huden ndan heu mbə chahal wa.

¹⁶ Sən ngganda Faara hu mee kee, amma hu tar ndan məməl wa tə sənda Faara wa. Kar Faara kanda, mba nda fər mamnggirha wa, mba nda

əna 'ya na ngga wa.

2

Kwaman tsawud Kərəstayirha

¹ Amma sa tēta ni a tsahangga fiya ha əngya na mēməl tē tsahad kəkafek.

² Tsahang suhurya həshya ha a kəs alten nda ngga, fər mamnggirha nda, tsawa nda məsələmnda nafiya, isha nda ngga ahu fərəkəkafek, tē nggəmnda tē kərəsta.

³ Tē kəm tsahang suhurya nishya ha a tsawa nda nishya kamngga tsau na nda fatakkwaya, mbə fa nggabaya aten finginga wa, nduwa finginga ngwanang na sa aam inabi kanda. A tsahang əngya nda fiya ha na ngga,

⁴ tēna nda tsahanggən wangya nishya ha na a nggəm chimayi ndan nda tē wanggindan.

⁵ A tsahang ngganda kanda ha kəm a kəsangganda alten ndan, a na nda chahal, əna taara nda ahu wura yindan, fərang mamnggirha nda chimayi ndan, ama waana niifa sar labar Faara.

⁶ Nəghən kee kəm yanang wundəlaya a kəs alten ndan nda ngga.

⁷ Ahu əngya heu kyadu fad wa niifa ni sa na a əna taara ngga, tsauka ən tsaharha. Ndeng yidwa tē tsahad wa ha tē kəkafek,

⁸ tē kəm labaara na ngga mbuwa na ən 'yaara sə ahurghən. Ahu 'ya kiya na fərang shilee fa kar yiwa, a walwa nda 'ya na nda a thləkrha aten nəm wa.

⁹ Ndang mafaya a fərang mamnggirha nda tawura yindan ko hu ma ni, təna nda tək mbəndə ndan fa. A nggərang nda pathla kanda mii wa,

¹⁰ nduwa ngaarang ngganda kanda. A meyedghən a kyad ndaarha nda ka nafiya ni kanda na təkəkafek fa. Ahu 'ya heu əna 'ya nda na a manang nda tsahadda ha na aten Faara Təhərəkə nəm.

¹¹ Kəsər Faara kyaddə nggayidghən ka a hərghanggən fiya heu.

¹² Nggayid dī ya nəghən a tsahang ndaarha kəm ha a malang nggəm əngya mbuwa ahu kwaman Faara, tək nggəm ən kəshiirha, kəs altennəm nən ha ngga. A tsawum ka nafiya na a əna 'ya na ngga, a tsawum nafiya na təkəkafek fa yī Faara ahu kəshiiddi ya.

¹³ Hu sayiddi nəm a kəla shiteena ahu parka na bayi ndəna wutta Faara ba hu mamnggidghən tək Təhərəkərhə Yeeso Kərəsti.

¹⁴ Yeeso ndən fərgəha fadghən ka a hərghanggən kəm ahu tar mbəlfəerha, kəsər tsawanggən fingya chahal a altenggən a tsawa nda nafiya tənə mid ndan fingya mbuwa na səbrəha yid ndan ahu əna taara na ngga.

¹⁵ Tsahang ənggini fiya ha ya, fərang kaali fingya na a sək sa, tək kəm yanangga kanda ngga. A nggəmna fa sargəha niifa tsahad wa ha wa.

3

Halla fa Takkwaya Yeeso

¹ Dalanggən fatakkwaya teena a fər alten ndan nda, fərang mamnggirha nda mamngya tək kutərya, ngwa nda fa ka a əna taara nda na ngga.

² Ndang kanda a chahang nda labaara ni-ifa sə mbuwa mbənggən wa, a tsawa nda hu dədəmnggirha, ana ten ndan kakrak wa, a tsauka ən ənən ndan ngga a fiya heu.

³ Kaar nurya ni, mbəm fər mamnggirha wa, kəl əna əngya mbuwa ngga. Suna ən kəshiirha dədəmən dədəmən thluranggən kəm, tsauka tsawud nəm yi kwidhura ni tə kəs ndan ha ahur. Kargha fiya kəm, kar kanda nəm kəm.

⁴ Amma a sayiddi kyana nggayirha tə nggəmnda Faara a pəpal ba,

⁵ hərghang də kəm. Əna nən kee mbə ka əna nəm əngya na ngga wa, amma kəsər hadang nəm fa ndən tsabang nən kəm də ahu Səsəna Təpədənda fərangga weerənda nggətta kəm tə yibrha.

⁶ Fərang Faara Səsəna kəm hai Təpədənda hangga ahu Yeeso Kərəsti Təhərəkrə nəm.

⁷ Kəsər ka nggayidghən ni chahang na Faara dīmiyid nəm kəm də nanəm a shang teena haar langaad yibrha fa mbuwa ngwalaarha.

⁸ Labardiya kəkafek ni. Na minna sə a ngərgħa chik pər əngginiya ngga, kəsər fīngya fərgħa kəkafek a Faara dənda mbeedə tə əna əngya na ngga. Əngginiya na nda ngga kaan, tə kəm na nda dang nda kowunni sə.

⁹ Amma malaman ngaala mere, tə kirəssa thləm chichiya, tə kakyathlanga aten ngyakhkya Yahudaya. Əngginiya mbə ka əngya ni wa.

¹⁰ Ana niifa sə na a thlək labara na tsahang teena hai ahur nun kəsə thləmad ndan yi tal tə yi səri. Akwasamadghən nduwu hai tə kanda.

¹¹ A sənanasə nafiya kəla yandīya mba nda hu kwaman kəkafek wa, dīmiyid ndan ngwang də

kumarha kanda sə.

Ngwalad mii pathla

¹² Na minna sə thlən Artimas ni nduwa Tikikus a thləmad nun də, ndeng yidwa banaba ba wal ngi a Nikafolis, kəsər na minna sə a əna feqrha ni a mbədi.

¹³ Əno 'ya na a mbang ənaarha dāngga Dzinās sə tə mbərmee, tə Apolos tərā nda hu kwamana hai. Dāng kanda sə ma kəḏəng nda 'ya wa.

¹⁴ Təta ni nafi nəm a tsaha fər alten ndan nda hu əna əngya na ngga, na nda a dāng ndan sə hu əngya kamngga na mindan. A tsau nda nafiya mbuwa əna taara wa.

¹⁵ Nafiya nanan heu a mbədiya kanda a ndo'ya fa. Ndang'ya shayi nəm fa na hu fərəkəkafek. Ngwa tsauka nggayid Faara tə kun heu.

Hona Bible

The New Testament in the Hwana language of Nigeria: Hona Bible

copyright © 2023 The Seed Company in collaboration with Language
Developers and Bible Translators Association

Language: Hona (Hwana)

Contributor: Language Developers and Bible Translators

This translation is made available to you under the terms of the Creative
Commons Attribution Share-Alike license 4.0.

You have permission to share and redistribute this Bible translation in
any format and to make reasonable revisions and adaptations of this
translation, provided that:

You include the above copyright and source information.

If you make any changes to the text, you must indicate that you did so in
a way that makes it clear that the original licensor is not necessarily
endorsing your changes.

If you redistribute this text, you must distribute your contributions
under the same license as the original.

Pictures included with Scriptures and other documents on this site are
licensed just for use with those Scriptures and documents. For other uses,
please contact the respective copyright owners.

Note that in addition to the rules above, revising and adapting God's Word
involves a great responsibility to be true to God's Word. See Revelation
22:18-19.

2025-07-18

PDF generated using Haiola and XeLaTeX on 26 Jul 2025 from source files
dated 18 Jul 2025

d942b897-c376-5386-bfaf-e0ce21c59136